

# Lètze d'on seüdâ mouobilizô a sa fène

Ale, le vin dè mâ 1915

Dzinta Jéneye,

Gran marsi pouo le pakiè kiè te m'â invoyã l'âtre dzo, setou pouo la seüsese frâtse : rinke dè pinsâ, mè lètse inkouo li pouo. T'â fran bîn fi dè l'invouortèyé din li bouote, sin l'arâde gnou. Si z'u d'obledja dè mè katché pouo la medjé, âtramin i m'arè falu partadjé avoui li z'âtre.

Fi atinsion dè pâ abêrâ la réne avoui d'ivoueu troua fraïdze, l'è sedzète a apeyé la bouotsaire è la ribe, É fi atinsion a la tètse du fin, âtramin n'âruvèrin pâ a apondre tînke u feürtîn. Tè fô sôpli, m'invouoyé le sa a pan kiè n'é ublô din la bouornète du beü. Krèye kè n'é inkouo, dedin, dè sô pouo li vatse. Kin te l'invouoyèri, inple le voui onna bouotèye dè goute è on kartaï dè bakon.

L'è mè kiè nètèye li bouote du kapitène; i mè di kè ie si le mi désônô dè la koble.

L'ârue inkouo pâ a krère kè n'é tène le tsevô du mâjà, onna tot'a bal'a bitche. On vaï preü kè medze pâ kè dè marè ! I l'a tan itô kontintè dè mè, kè m'a baya dou fran. Se sé danô dè réjian deübe inkouo Djodjè, tè fô tè plindre a la Kemesion skoulére. Te paraï, no veül'in kin mimoueu pâ lasié éstrepia sé maïnô pè dè dzin kiè son mimoueu pâ dè la kemouene ! I mè fôdrè asebîn dè kaneson , avoui hla kouose, i tè fi onna kramene kiè te tè dîrè inô pè Plan Salintse ! Mè asebîn onna pouegna dè peühlè , on sè fi roudjé pè li pudze.

On parsai dè galonô fiè min dè z'âne, mi a mè i mè fon pâ pouaïre. Pè bouoneu k'on u u l'âtre, on peü alâ a la pînte dè Koujenè. Li, la pîntière Jilbêrte, rusè teti a remoutâ le mouoral a tchui. Pouo la remarsié, on seüdâ konpouõtiteu l'a konpouozô Jilbêrte dè Kourjenè, onna tsanson kiè n'in tchui apraï a tsantâ.

Kan te m'invouoyèri li kaneson, uble pâ dè kieüdre dedin, onna fate pouo katché l'ardzin. Dreme dékoutè on frebouordzaï è si rin tan suivre dè pâ m'fire robâ.

- Se t'â le zi, baye mè dè noval di bouoti è di mè se fon teti ingrîndjé le réjian ? Se Pièrô di z'inpô viñ tè démandâ d'ardzin, invouoye le bouozâ è di laï bîn kè n'in n'in rin !

Se, ne sâv'in pâ tan kè fire a pâ kè dè dzeyé a la gère. Pouo vouaï l'è to è tè dzoute.

Plaside André Bonvîn

Le trintchon du doze 2001